

Communicaziun a las medias dals 11 da matg 2022

La BCG survegn in predicat per la cumpatibilitad da professiun, famiglia e temp liber

Il post spezialisà UND ha dà a la Banca Chantunala Grischuna (BCG) il predicat "famiglia & professiun". Questa distincziun attesta a la BCG da porscher a sias collavuraturas ed a ses collavuratur cundiziuns d'engaschament e da lavur favuraivlas per famiglias.

La Banca Chantunala Grischuna sa posiziunescha sco interpresa responsabla e moderna. Ina part impurtanta è era la cumpatibilitad da professiun, famiglia e temp liber. Il predicat "famiglia & professiun" dal post spezialisà UND conferma la qualitad da la BCG sco patruna.

Avant che la banca è vegnida certitgada, ha ella stuì sa suttametter ad in lung process d'examinaziun ed absolver differents moduls. «Il resultat mussa che nus essan sin la dretga via. La cumpatibilitad da vita professiunala e vita privata è centrala per la cuntentientscha e l'effizienz da nossas collavuraturas e noss collavuratur», di Alexander Villiger, manader da persunal da la BCG. «Il certificat ans motivescha d'augmentar noss'attractivitat sco patruna cun ulteriuras mesiras», cumplettescha Martina Müller-Kamp, commembra da la direcziun da la BCG.

La BCG realisescha dapi onns cuntinuadamain iniziativas per ademplir sia responsabladad envers il persunal e sa posiziunar sco patruna moderna. Da questas stentas fan part per exempel in model flexibel da temp da lavur annual, la pussaivladad da cumprar ulteriuras emnas da vacanzas u da lavurar a moda mobila. Ultra da quai porscha la BCG a tut las collavuraturas ed a tut ils collavuratur in program da perfecziunament a la Scola auta spezialisada dal Grischun. Il studi orientà a la pratica e complementar a la professiun augmenta las schanzas sin il martgà da lavur e porscha a las absolventas ed als absolvents perspectivas futuras interessantas.

- Infurmaziuns davart la BCG sco patruna: gkb.ch/arbeitsgeberin
- Infurmaziuns davart il post spezialisà UND: fachstelle-und.ch

Contact:

Thomas Müller, thom.mueller@gkb.ch, telefon +41 81 256 83 11

Daniel Daester, daniel.daester@gkb.ch, telefon +41 81 256 88 01

Banca Chantunala Grischuna, Medias & Investor Relations, chascha postala, 7001 Cuir
medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. L'interpresa cun sedia principala a Cuir è represchentada en passa 40 lieus en il Grischun. Cun var 1'000 collavuraturas e collavuratur è la BCG ina da las pli grondas patrunas en il chantun. Sia attaschadad al Grischun exprima ella en differentas modas. Ultra da sias activitads economicas s'engascha ella cun ses sponsuradis, ses fond da contribuziuns e sias purschidas per lavur voluntara.